




## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

### გუდიაშვილი ლადო (ვლადიმერ) დავითის ძე



ლ. გუდიაშვილი

გუდიაშვილი ლადო (ვლადიმერ) დავითის ძე [18 (30). III. 1896, თბილისი, - 19. VII. 1980, იქვე], ფერმწერი, გრაფიკოსი, მხატვარ-მონუმენტალისტი, თეატრისა და კინოს მხატვარი. საქართვე. (1958) და სსრკ (1972) სახალხო მხატვარი. შოთა რუსთაველის სახ. სახელმწ. პრემიის ლაურეატი (1965), სოციალ. შრომის გმირი (1976), თბილისის საპატიო მოქალაქე (1979). დაამთავრა თბილისის ნატიფ ხელოვნებათა წამახალისებელი კავკასიის საზბის სამხატვრო სკოლა (1914). ხატვას ასწავლიდა თბილისის ვაჟთა კლასიკურ გიმნაზიაში (1914- 19). მისი პირველი ნახატები დაიბეჭდა ჟურნ. „თეატრსა და

ცხოვრებაში" (1914). ამ პერიოდში შექმნილ გრაფიკულ ნახატებს აქვეყნებდა ჟურნალებში: „არსი" („ARS"), „ფენიქსი" და სხვ. პირველი მიღწევები 1915 მოეწყო მხატვრის ნამუშევრების პირველი პერსონალური გამოფენა. 1916 გ-მა სხვა მოღვაწეებთან ერთად დააარსა „ქართველ ხელოვანთა საზოგადოება", მონაწილეობდა ძვ. ქართ. კულტურის ძეგლების შემსწავლელ (1916-17) და 1917 ე. თაყაიშვილის მიერ ისტორიულ სამხრ. საქართველოში მონყობილ ექსპედიციებში; გაეცნო ქართულ ძეგლებს, იღებდა ფრესკების პირებს. თბილისში მოხატა ძვ. კაფე „ფანტასტიკური დუქანი" (1917). მონაწილეობდა რესტორან „ქიმერიონის" (ახლანდ. შოთა რუსთაველის სახ. თეატრის შენობის ნაწილი) მოხატვაში (1919). 1917-19 შექმნა თბილისისადმი მიძღვნილი ციკლი: „სტეპკოს დუქანი", „ქრისტიანე", „კინტოების ქეიფი ქალთან" (სამივე 1919) და სხვ. ამ პერიოდში გ-მა გაიცნო ნ. ფიროსმანაშვილი, რ-საც შემდგომ მრავალი ნაწარმოები უძღვნა. მასვე ეკუთვნის 22 ილუსტრაცია პირველი ქართ. მოდეების ჟურნალისათვის. პარიზში მოგზაურობა 1919

გაემგზავრა პარიზში, მეცადინეობდა ვ. რონსონის ე. წ. „თავისუფალ აკადემიაში“. პარიზში ყოფნისას კვლავ განაგრძო მუშაობა ძვ. თბილისის თემაზე („მოქეიფენი ეტლში“, „თევზი ცოცხალი“, „სადღეგრძელო გარიჟრაჟზე“; სამივე 1920, საქართვე. ხელოვნ. მუზეუმი). ამავე დროს, მხატვრის შემოქმედებაში გაჩნდა მთავარი პერსონაჟი – ქალი. გ-მა ქართ. ფერწერაში პირველმა შემოიტანა „ნიუს“ ჟანრი (ხატავდა შიშველ, უმეტესად ქალის, სხეულს). ამ პერიოდს ეკუთვნის ნაწარმოებები: „გაზაფხული“, „იდილია“, „ქეიფი ფაეტონზე“, „ცოცხალი“, „მონადირე“, აგრეთვე პარიზის თემაზე შექმნილი ნამუშევრები: „ხიდი პარიზში“, „პარიზელები“, „პარიზელი მოქალაქენი“ და სხვ. პარიზში ყოფნისას აქტიურად მონაწილეობდა სამხატვრო გამოფენებში. 1922 და 1925 გ-ის პერსონალური გამოფენები მოეწყო პარიზში. მისი ნამუშევრები შეიძინეს ცნობილმა კოლექციონერებმა და გალერეებმა („სამემოდგომო სალონი“, „გალერეა ჟოზეფ ბიე“, „ლიკორნი“), მადრიდის ეროვნ. მუზეუმმა „პრადომ“. იმდროინდელ ფრანგულ პრესაში ხშირად ქვეყნდებოდა წერილები გ-ის შემოქმედების შესახებ. გამოიცა ფრანგი მწერლის მორის რენალის მონოგრაფია – „ლადო გუდიაშვილი“. თბილისში დაბრუნება 1926 გ. დაბრუნდა თბილისში. იმავე წელს შოთა რუსთაველის სახ. დრამატული სტუდიის შენობაში მოეწყო მისი პერსონალური გამოფენა. 1926–31 დაუახლოვდა კ. მარჯანიშვილს, გააფორმა სპექტაკლები: „მზეთამზე“, „ლამარა“, „არსენა“, აგრეთვე მ. ჭიაურელის ფილმები: „საბა“, „ხაბარდა“. 1927–34 იყო თბილისის სამხატვრო აკადემიის პროფესორი. სამშობლოში დაბრუნებულ მხატვარს გაუჭირდა საბჭ. რეალობასთან შეგუება. მისთვის უცხო იყო ე. წ. სოციალ. რეალიზმის პრინციპები, ამ ჟანრში ვერ შეძლო საკუთარი ინდივიდუალობის პოვნა. ეს განწყობა აისახა მის ნამუშევრებში („ბოროტი ოჯახი“, „უმწეო“, „განწირული“, „ჩინეთი“ და სხვ.), სადაც გამუქებულია ფერწერული ტილოების კოლორითი, ხოლო ექსპრესიულობისთვის დარღვეულია ფიგურის ანატომიური სიზუსტე. 1930 იქორწინა ნინო მგელაძეზე (შემდგომ – ნინო გუდიაშვილი), რ-იც მთელი ცხოვრების მანძილზე მხატვრის მუზა და ერთგული მეგობარი იყო. 1931–40 მონაწილეობდა სამხატვრო გამოფენებში (თბილისი, მოსკოვი, ჩიკაგო, პარიზი, მარსელი, ლონდონი და სხვ.). თბილისის ოპერისა და ბალეტის თეატრში გააფორმა სპექტაკლი „ქეთო და კოტე“. მიღწევები 1946–48 თბილისში მოხატა ქაშვეთის ეკლესიის საკურთხეველი. ქართველ მხატვართაგან პირველმა დაასურათა (XVII ს. მინიატიურების შემდეგ) და გრაფიკულად გააფორმა შოთა რუსთაველის „ვეფხისტყაოსანი“ (1934). მასვე ეკუთვნის სულხან-საბა ორბელიანის წიგნის „სიბრძნე სიცრუისას“ ილუსტრაციები (1930). დაასურათა ასევე ქართველ და უცხოელ მწერალთა მრავალი წიგნი. 1957 თბილისში, საქართვე. სურათების გალერეაში, ხოლო 1958 მოსკოვში, მხატვართა კავშირის დარბაზში, მოეწყო გ-ის პერსონალური გამოფენა, სადაც პირველად სრულად იყო წარმოდგენილი მისი ნამუშევრები. 1960–80 მონაწილეობდა ევროპის ქალაქებში მონყობილ გამოფენებში. გ. ეკუთვნის ქართვ. მხატვართა იმ თაობას, რ-საც მიზნად ჰქონდა დასახული ხელოვნებაში ეროვნ. ფორმის ძიება. მხატვარს იმთავითვე ჰქონდა მიდრეკილება დეკორაციულობისა და მახვილი ექსპრესიულობისაკენ, ამაში იგი ეროვნ. თავისებურებათა გამოვლინებას ხედავდა. გ-ის ეროვნ. შემოქმედების ინდივიდუალობას დიდად შეუწყო ხელი XX ს. 20-იანი წლების ევრ. ხელოვნებაში არსებულმა მოდერნისტულმა მიმდინარეობამ. უდიდესი ზეგავლენა

მოახდინა აგრეთვე ძველმა ქართულმა კედლის მხატვრობამ, მინიატიურამ და მონუმ.-დეკორ. ხელოვნებამ. შთაგონება გ-ის ხელოვნების საიდუმლო მისი ხაზის ექსპრესიონისტულ გამომსახველობაშია. შემოქმედების პირველ წლებში გ-ის თემატიკა მოიცავდა, ერთი მხრივ, ძვ. თბილისის ბოჰემური ცხოვრების სცენებს (რაშიც, შესაძლებელია, ერთგვარი როლი ითამაშა გ-ის შეხვედრამ ნ. ფიროსმანაშვილთან), მეორე მხრივ, საქართვ. წარსულით შთაგონებულ ლეგენდებსა და სიუჟეტებს („ნადირობა“, 1920, მხატვრის სახელოსნო; „იდილია“, 1920, საქართვ. ხელოვნ. მუზეუმი; „ქალი კლდეებში“, 1923, მხატვრის მისახელოსნო) და სხვ. თბილისური ბოჰემისადმი მიძღვნილ საუკეთესო სურათებში მხატვარი ღრმა დრამ. გამომსახველობას აღწევს. პარიზში ყოფნის დროს საფუძველი ჩაეყარა გ-ის მორალური და სოც. თემებისადმი მიძღვნილ სატირული ხასიათის ნახატების ციკლსაც. საქართველოში დაბრუნების შემდეგ მხატვრის შემოქმედებაში აისახა ქართვ. ხალხის წარსული („ლეგენდა თბილისის დაარსებაზე“, 1946; „ყეენობა თბილისში“, 1937, საქართვ. ხელოვნ. მუზეუმი; „საკადრისი პასუხი“, 1945, მხატვრის სახელოსნო, და სხვ.), შექმნა ისტ. პირთა და თანამედროვეთა პორტრეტები („ნიკო ფიროსმანაშვილი“, 1928, საქართვ. ხელოვნ. მუზეუმი; „ნიკოლოზ ბარათაშვილი“, 1941; „ბექა და ბექენ ოპიზრები“, 1946, ორივე მხატვრის სახელოსნო; „ნინო გუდიაშვილი“, 1937, მხატვრის სახელოსნო; „თამარ ციციშვილი“, 1940, საქართვ. ხელოვნ. მუზეუმი; „აკადემიკოსი დიმიტრი უზნაძე“, 1945, კერძო კუთვნილება; „ნათელა ახვლედიანი“, 1941, კერძო კუთვნილება, და სხვ.). შექმნა ბოროტებისა და მშვენიერების დაპირისპირების ამსახველი გროტესკული ჟანრის გრაფიკული ციკლი („ტვინის ჭყლეტა“, „ცენზურა“, „ყასაბი“, „იმპერატორი“ და სხვ.). გ-ის შემოქმედებაში მნიშვნელოვანი ადგილი ეთმობა მშვენიერების თემას, აღბეჭდილს დიდი სითბოთი და პოეტური აღფრთოვანებით („მაია სატრფოს მოლოდინში“, 1940, „ეთერი სარკის წინ“, 1940; „საქორწინო განბანა“, 1942; სამივე – მხატვრის სახელოსნო; „გოგონები საყვარელ ნაკადულთან“, 1943, კერძო კუთვნილება, და სხვ.). აღსანიშნავია II მსოფლიო ომის ამსახველი გრაფ. სერია („საზიზღარი ქვეწარმავალი“; „აგრესორის ულტიმატუმი“, ორივე 1942, მხატვრის სახელოსნო, და სხვ.). სხვა გრაფ. სერიაში ალეგორიული და სიმბოლური სახეებით არის გაკიცხული ადამიანის მანკიერი მხარეები („თავმოკვეთილი მეუღლე“, „ფუჭი დიდების აღსასრული“, „სილამაზის მესაფლავენი“, 1941; „მცდარი მისამართი“, ყველა – მხატვრის სახელოსნო, და სხვ.).



ლ. გუდიაშვილი. "ნიკო ფიროსმანაშვილი". 1928.

გ. მკაფიოდ გამოსახული ინდივიდუალობის მქონე შემოქმედია, რ-მაც მხატვრულ სახეთა საკუთარი მდიდარი სამყარო შექმნა. შინაარსის შესაბამისად, გ. თავის სურათებსა და ნახატებში ხან სადღესასწაულო, ამაღლებულ, „ზღაპრულ“ განწყობილებას ქმნის, ხან ფსიქოლოგიურად ღრმასა და დრამატულს, ხან თეატრ. სანახაობას, ხანაც გროტესკისას. მისი ნამუშევრები გამოირჩევა დახვეწილი და დასრულებული კომპოზიციით, დეკორაციულობითა და, ზოგჯერ, ორნამენტულობითაც. გ-ის შემოქმედებამ საერთაშ. აღიარება მოიპოვა. მისი ნამუშევრები დაცულია საქართვ. ეროვნ. მუზეუმში, მის ოჯახში, საქართვ. და უცხოეთის კერძო კოლექციებში. გ-ის სახელი ეწოდა მცირე ცთომილს (იხ. სტ. გუდიაშვილი). საქართველოში და უცხოეთის სხვადასხვა ქვეყნებში გამოცემულია მხატვრისადმი მიძღვნილი მრავალი ალბომი და წიგნი. დაკრძალულია მთაწმინდის პანთეონში. საფლავზე დგას გ-ის ძეგლი (მოქანდაკე ე. ამაშუკელი,

არქიტ. ნ. მგალობლიშვილი, 1985). თბილისში არის ლადო გუდიაშვილის მოედანი, გუდიაშვილის ქუჩა. ქუჩის ბოლოს, 9 აპრილის სახ. ბაღში დგას გ-ის ძეგლი (მოქანდაკე დ. მიქაბაძე, არქიტ. რ. ბერიძე, 2003, ბრინჯაო). გარდაცვალების შემდეგ გ-ის პერსონალური გამოფენები მოეწყო რომში (1991, სან-მიკელეს ტაძარი), თბილისში (1996, სურათების ეროვნული გალერეა) და პარიზში (1997, საფრ. ნაციონალური ასამბლეის მორნის გალერეა).

ლიტ.: ბ ე რ ი ძ ე ვ., ლადო გუდიაშვილი, თბ. - ბუდაპეშტი, 1975; ლადო გუდიაშვილი - 120, თბ., 2016; უცნობი ლადო გუდიაშვილი, თბ., 2021; З л а т к е в и ч Л., Ладო Гудиашвили, Тб., 1971; Ладო Гудиашвили. Альбом. Сост. М. К. Коган. Автор текста Л. Златкевич, Л., 1983; Lado Gudiachvili. Assemblée Nationale, P., 1997; R a y n a I M., Lado Gudiachvili, P., 1925.

**ვ. ბერიძე**

**ა. მელიკა**

---